

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Vawiin hi Sairanga rel a lo luh atanga thla 1-na chiah a ni a, rel a luh hnuah Mizoramah khualzin an pung nasa hle a, sum vei vak a pun phah ni a sawi a ni.
- 2. Chief Minister Pu Lalduhoman Social Media a thu belhchian dawlllo leh rintlak loh thehdarh a tam em em lain journalist te chu thu dik puangdarhtu, mipuite tana rinawm taka rawngbawltu ni tura ngaih an ni, a ti.
- 3. Election Commission of India chuan vawiin khan Bihar Assembly inthlan thawh hnihna chungchanga hriattirna a ti chhuak
- 4. Supreme Court chuan Tamil Nadu-a mi 41 an thih phahna Karur-a mipui inpawngnekna thleng chhui turin CBI a hriattir.

<><><>

SAIRANG REL

Sairang a rel a luh hnuah Mizoramah khualzin an pung nasa hle a, sum vei vak a pun phah niin hemi chungchang hrechiantuten an sawi.

Vawiin hi Sairanga rel a lo luh atanga thla 1-na chiah a ni a, Akashvani Aizawl zawhna chhangin Hotel Jay Jay, Falkland Veng, Aizawl neitu Pu Jarvis Lalramnghaka Chhakchhuak chuan September ni 13-a Sairang rel a service tan atang khan an Hotel a mikhual thleng zat chu a letin an pung tih sawiin, an room neih zatah pawh an leng lo fo a ti a, state pawn atanga khualzinte chuan Mizote fel an tih thu leh Mizoram nuam an tih thu sawiin, relrawn lut chu Hotel neitute chauh ni lovin mi tam takin an tangkaipui a ti a, Mizorama tlawh tur hmun hrang hrangah te tlawhtu an tam phah a, taxi leh lirthei hmanga eizawngten an tangkaipui a, khualzinten Mizo thil an ei chak avang leh Mizoram thil hawn an duh thin avangin thingpui dawr leh Bazar-a sumdawngte pawhin an hlawkpui hlea a rin thu sawiin, tunhmaa khawlaia sum vei vak tlem thin chu rel service hnuah a pung hluai nia a hriat thu a sawi a ni.

Byte: Hotel Jay Jay Owner Jarvis

Zotlanga The Annexe Homestayneitu Nunui pawhin relrawn luh hnuah mikhual an pung nasa tih sawiin, zankhat riak an tam avangin room an indaih ngai

mang lo a ti a, rel rawn luh hma chuan khualzinte chuan Mizoramah an rawn zin leh zen zen theih tawh an rin loh avangin zan 4/zan 5 te an riak tlangpui a, tunah chuan rel hmanga tlawm te a rawn zin luh a awlsam tawh avangin Aizawl hmuh chak hrim hrim avang te, bazar duh vangte, Mizoram rel kawng a mawi avanga zin chak ve chak hrim hrim vangte in zankhat lek riaka rawn zin lut an tam a ti a.

Assam leh West Bengal atangin an tam zual tih sawiin, Kerala leh state dang atang te pawhin tunhmaa thlawhna a rawn zin ngam lo, sum seng tam ngam lo leh zirlaite zingah rel rawn luh hnua rawn zin lut an tam a ti a, state dang mite zingah Shillong aiin Aizawl nuam ti zawk an tam tawh tih sawiin, kawngpui te siam tha in Mizoram thingtlang khua te chu tlawh tlaka siam a nih phei chuan hmarchhak state zinga tlawh hlawh zual Sikkim leh Meghalaya te aiin Mizoram chu a nep bik lova a hriat thu a sawi a ni. Nunui chuan loneimi te pawhin lo nei chung pawhin room 2/1 awmna homestay te hawng se, hah taka kum khat chhunga lo neih atanga an sum lakluh thin chu hahdam takin thla khat chhung lekin an lakluh theih a rin thu a sawi a, khualzinte chuan Mizote chu khualzin lo chhawn leh puih kawngah fel an tih thin avangin Mizoram chuan khualzin hip kawngah theihna sang tak a nei nia a hriat thu a sawi bawk a ni.

Byte:The Annexe Homestay owner Nunui

Kum 11 chhung lirtheia khualzin phur kuala eizawng Pu Ramnuna chuan Sairanga rel a luh hnua khualzin zaa 70 vela an pung nia a hriat thu a sawi a, khualzin phur kuala eizawng thin lirtheite chu an indaih lo hle a ti a, rel rawn luh hnua Assam leh West Bengal atanga rawn zin an tam zual tih sawiin, Aizawl leh a chhehvela hmun tlawh tur awm: Reiek tlang, Lalsavunga Park, Solomona Temple, Aizawl Peak View Point leh Skywalk te bakah Mizoram leh Myanmar inrina Zokhawthar leh Mizo pipu sulhnu tamna, Vangchhia, Farkawn leh Dungtlangte chu khualzin te tlawh duh zual a ni a ti a, Champhaia hnahsin kut lo awm turah pawh tunhnai hian khualzin an kal tam hle niin a sawi a ni.

Byte: Pu Ramnuna

Sairang Rel Station ILP counter atanga Akashvani thu dawn danin, September ni 13 atanga vawiin October ni 13 thlengin Sairang rel stationah ILP 5154 pek chhuah a ni tawh a, Guwahati - Sairang Express a chuangte zingah ILP pekchhuah a tam ber a ni.

<><><>

CM

Chief Minister Pu Lalduhoman Social Media a thu belhchian dawlo leh rintlak loh thehdarh a tam em em laiin mipuiten thu dik hrilhtu leh kaihruaitu tha an mamawh a, MJA member leh accredited journalist te chu chutianga thu dik puangdarhtu, mipuite tana rinawm taka rawngbawltu ni tura ngaih an ni, a ti.

Serchhip District MJA te pawl din cham kum 25-na, Silver Jubilee vawiina an lawmna hmanpuiin Bialtu MLA Pu Lalduhoma chuan Accredited Journalist te chu dawt leh thu belhchian daw lo thehdarh tura ngaih an ni lo a ti a, tunah phei chuan social media a chakin a rang si a, mitinin a thehdarhna hmanrua an hum fur mai a. Thu leh hla a darh chum chum a, thu dik leh dik lo hriat hran a har thin a, Politics lama inbeihna tawngkam leh comment tam takte phei chu chhiar hrehawm khawpa mawi lo a tam sawt hle. Hetianga social media lama thu belhchian daw lo vak

lo thehdarh chingte, tawngkam bawlhhlawh tak tak hmanga midang umzui chingte hi mi rawntlak leh chinchang hria an vang viau ang a ti a ni.

Journalist te chu New Media hmanruate hmang thiam ve zel se tha a tih thu leh nitin chanchinbute nena inhnerem taka kalpui theih a that thu a sawi a, ram leh khawtlang tana rawng an lo bawl tawhnaah lawmthu hrilhin an kal zelna turah duhsakna a hlan a ni.

Mumal taka kal Serchhipa chanchinbu hmasa ber chu Lenkawl niin kum 1981 khan Pu Remmawia Kawlni in a din a. Kum 1993-ah Ramlai Arsi a lo chhuak ve leh a, kum 2000 chhovah an pung ta a. Serchhip District Journalist Association an din a, kum 2006-a Mizoram pum huapa MJA an lo inchhunfin khan anni pawh an inchhunglut ta a ni.

Serchhip District MJA te pawl din cham kum 25-na hawnna inkhawm ah hian an Home Minister Pu K Sapdanga pawh a tel a, ani bakah President Pu C. Lalhminghlua leh MJA General Headquarters aiawhte pawhin thu an sawi a ni.

<><><>

HOME MINISTER

Home Minister Pu K.Sapdanga'n Dan ang taka Police lak leh a nih tur thu sawiin, chhungte thi tawh aia in lak ngawt theih a ni tawh lo a ti.

He thu hi vawiina Serchhip ZPM office-a Serchhip ZPM party hruaitute nena inkawmhonaah sawiin, Pu K.Sapdanga chuan tun dinhmunah Mizoram Police –ah post ruak 3,647 a awm mek a, kum tin thihna leh pension avangte in post ruak 200 chuang a awm ziah ang a ni a ti a, kum 2021 atang khan Court leh Constitution thikthu a chhiat avangin dan ang taka thiltih a ngai tawh a ti a, Police chu kalpaha inlak ngawt theih a ni lova, chhungte boral tawh ai pawh lak ngawt theih a ni tawh lo a ti.

Home Minister chuan Police post ruak tam lutuk tiziaawmna tur hian Home Department chu a inbuatsaih leh mek a, DP&AR leh Law Department-ah te dilna thehluh leh a ni dawn a. Police lak hnunngberah khan Post 1,100 an dil a, DP&AR leh Law Department lamin mi 250 min phalsak thung a ni. Police Headquarters atangin survey kan nei mek a, district tina Police indaih loh dan report lakkhawm a ni mek bawk a ti a, Hmun hrang hranga Police Quarters te pawh an awngrawp tawh hle a, hei pawh hi a chhiat dan leh tihzui dan tur November thlaah report kim theih beisei a ni a, thumthat tum a ni bawk a ti a ni.

Mizo Territorial Army din tur pawh thla tharah advertisement chhuah tum a ni a, a tira mi 75 lak tura ruahman chu an dil belh hnuah mi 150 lak phalsak an ni tawh tih a sawi.

Home Minister Pu K.Sapdanga hi vawiin khan Mizoram Journalist Association, Serchhip District Silver Jubilee lawmnaah Khualzahawm a ni a, Programe tan hmain ZPM party hruaitute nen inkawmin, ZPM party hruaituten khawtlang hmasawmna tur mamawh hrang hrang an thlen te chu Home Minister chuan a theih anga bawhzui a nih tur thu a lo hrilh a ni.



DISHA

Aizawl ah District Development Coordination &Monitoring Committee (DISHA chu an Chairman, Lok Sabha MP Pu Richard Vanlalmangaiha kaihhruaiin vawiin khan an thukhawm a. Meeting-ah hian Minister 2 Pute: Lalthansanga leh Dr.Vanlalhlana leh MLA 2: TBC.Lalvenchhunga, Adviser to CM (Finance) leh Pi Baryl Vanneihsangi te pawh an tel a ni.

Vawiin meeting-ah hian thla ruk April-September, kalta chhunga Aizawl District chhunga Department hrang hrang hnuaiia Centrally Sponsored Scheme(CSS) hmalakna hrang hrang te chipchiar taka thlirho niin, chak zawka CSS kalpui dan turte, Department hrang hrang inkara thawhhona tha zawk neih dan tur te sawiho a ni.

Aizawl District chhunga CCS khawih Department hrang hrang 27-a aiawhten Centrally Sponsored Schemes hnuaiia an hmalakna theuh leh hmachhawp te meeting-ah hian report an pe a.Minister leh MLA te hian rawtna an neih te meeting-ah hian tarlangin, an thil hriatchian duh te pawh an zawt bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



BIHAR

Election Commission of India chuan vawiin khan Bihar Assembly inthlan thawh hnihna chungchanga hriattirna a ti chhuak. Inthlan thawh hnihna hi Assembly bial 122 ah neih tur a ni a. District 20 huamchhungah inthlan a ni ang. Inthlan chuh tumte tan tun thla ni 20 thleng hming thehluh theih a ni a. A tuk ni 21 ah hming thehluhte hi endik a ni ang. Inthlan chuh tumte tana inhnuhdawh theih hun tawp chu tun thla ni 23 hi a ni a. Thlaleh November ni 11 ah vote thlak a ni ang.

Bihar Assembly inthlan lo awm turah hian NDA te chuan Assembly seat an insem dan tur an puang thei tawh a. BJP leh JDU te seat 101 ve ve ah an ding ang a, LJP (Ram Vilas) ten MLA bial 29 leh HAM ten bial 6 an chang thung ang.BJP hruaitute leh an thawhpui Political Party te New Delhi-a an inhmukkhawm hnuah he thu hi puan a ni a. Kum 2020 Bihar Assembly inthlanah khan BJP chuan seat 110 chuhin Janata Dal ten seat 105 an chuh a. Heng zingah hian BJP te seat 74 ah thlan tlin an ni a. Chirag Paswan-a kaihhruai Lok Janshakti Party erawh chuan independent in an chuh thung a. JD(U) te seat 43 ah chauh thlan tlin an ni thung a ni.

Hetihlai hian opposition lam Grand Alliane te chuan Bihar Assembly inthlan atan hian seat insem dan turah inremna an la nei thei lo a ni.

<><><>

SC

Supreme Court chuan Tamil Nadu-a mi 41 an thih phahna Karur-a mipui inpawngnekna thleng chhui turin CBI a hriattir. Thlan hmasa ni 27-a Tamilaga Vettri Kazhgam TVK huaihawt mipui punkhawmnaa vanduaina thleng hi Madras High Court chuan Special Investigation Team te chhui turin a lo ti tawh a. High Court thutlukna hi Supreme Court chuanrawn lanin CBI chhui tir turin a ti a. Justice JK Maheswari leh NV Anjaria te chuan he thil chhui dan viltu committee dinin Suprem Court judge hlui Justice Ajay Rastogi chuan member pathum awmna committee hi a ho dawn a ni.

<><><>

GAZA CEASEFIRE

Gaza indona titawp tura ruahmanna thawhkhawtnaah vawiin khan Hamas te chuan Israel mi an hren lai pasarih an chhuah zalen. Inkahhai inremna ang chuan Hamas te hian an mi hren mek mi 20 an chhuah ang a, Israel lamin Palestinian an hren mek mi 1900 an chhuah ve thung dawn a. Hamas in an mi hren an chhuahte hi Red Cross kuta dah niin an ni hian Israel kutah a hlan chhawng leh dawn a ni. Inkahhai inremna angin US sipai kaihhruaiin ram hrang hrang sipai 200 chuangin inkahhai puan hi an vil ang.

Israel leh Hamas induna ti tawp tur hian International Peace Summit Egypt ah neih a ni dawn a. He hunah hian US President Donald Trump leh Egypt President Abdel Fattah el-Sisi te chuan inhmukhawm hi an kaihruai dawn a. Ram 20 atangin hruaitute an kalkhawm dawn a. Gaza indona titawp tura inremna an siam dawn a ni. Ram hruaitu kal tur zingah hian UK Prime Minister Keri Starmer leh UN Secretary-General Antonio Guterres te pawh an tel a. Asia khawthlang lama remna leh muanna siam tur leh hun thar tha zawk din turin an inhmukhawm dawn a ni.

<><><>